

**16 IUNIE**  
**RUGACIUNEA 1**  
**SF.CUVIOS**  
**TIHON DE LA KALUJA**

**МОЛИТВА**

О, священная главо, великий чудотворче, преподобне отче наш Тихоне, преблаженне и преславне, Духа Святаго исполнение, постников похвало, монашествующих славо, пустыни украсителю, теплый о нас грешных молитвенниче! Ныне со ангельскими воинствы предстояй у престола всех Царя славы Господа и наслаждаяся света Единосущныя Троицы и с горними силами воспевая Трисвятую песнь, яко дерзновение имея, молися всемилостивому Владыце, спасти вся верующия во имя Его: испроси мир и тишину святым церквам ниспослати, вере православней укрепление, вся противныя языки, брани хотящия, видимыя враги низложити, грады наша утвердити, мир весь умирити. Моли милостиваго Бога, да, твоим благоприятным ходатайством, вся православная христианы избавит Он от глада, губительства, труса, потопа, огня, меча, от нашествия

иноплеменник и междоусобныя брани. Старыя да подкрепит, юныя да наставит, немудрыя да умудрит, болящия исцелит, плененныя и юзники свободит, сироты заступит, младенцы воспитает, и вся люди сохранит от всех бед и напастей и от нападения вражия, и смертоносныя язвы, и тлетворных ветр, и от всякаго зла. Днесъ же с верою приходящих рабов твоих (*имена их*), со страхом и любовию припадающих ко святой иконе твоей и образ подобия твоего любезно целующих, яко теплый наш заступниче, сохрани, и в скорбных обстояниях наших предстани, душевных и телесных страстей свободи. В день Страшнаго Суда шуияго стояния избави и с десными овцами молитвами твоими стати сподоби и слышати блаженный оный глас Владыки Христа Бога нашего: "Приидите, благословеннии Отца Моего, наследуйте уготованное вам Царство от сложения мира", Ему же подобает всякая слава, честь и поклонение со Безначальным Его Отцем и со Пресвятым и Благим и Животворящим Его Духом, ныне и присно и во веки веков. Аминь.